

四庫全書

經部

欽定四庫全書

禮經本義卷十四

無錫蔡德晉撰

凶禮

士虞禮

此言士喪既葬而虞祭之禮鄭康成曰虞安也
士既葬其父母迎精而反日中而祭之於殯宮
以安之也

特豚饋食側亨于廟門外之右東面魚腊饗亞之北上

饔饔在東壁西面

祭用黍稷曰饋食猶言饋之以食也側亨一胖也吉祭全左右胖此惟亨一胖者以虞不致爵自獻賓以後無主人主婦及賓已下之俎故也亨於爨之饔不於門外東方別於吉祭也廟謂殯宮爨竈也炊黍稷曰饔饔爨在堂下云東壁者見其近於壁也特牲云主婦視饔爨於西堂下今在東亦別於吉也凡爨饔皆有

設洗于西階西南水在洗西篚在東

故君善曰設洗在西以主人位於西階上故也篚實爵馬賈公彥曰此亦別於吉吉時設洗皆當東榮南北以堂深今在西階西南亦當西榮南北以堂深可知也

尊于室中北墉下當戶兩甌醴酒酒在東無禁幕用絺布如勺南枋

吉時尊於戶東今尊於室中亦別於吉也當戶謂置於宦正對戶也醴酒並用者醴以饗神酒以飲尸亦見其未甚變於奠也酒在東上醴也兩甌西上亦以神席在西也

素几葦席在西序下

大斂奠時有席至此乃用几辟尊者之禮也司几筵云凡喪事設葦席右素几諸侯每敦一几謂奠時也是天子諸侯始死即几席具矣

苴刈茅長五寸束之實于筐饌于西牀上

苴藉也所以藉
祭也刊切也

饌兩豆菹醢于西楹之東醢在西一鉶亞之從獻豆兩
亞之四籩亞之北上

醢在西東上也東上者變於堂下敦位也一鉶則豕
也亞於醢又在其西也此豆籩云從獻者豆從主人
獻祝四籩則二籩從主婦獻尸二籩從主婦獻祝皆
先獻而後薦故也兩豆亞於鉶菹在鉶西醢在菹南
也四籩亞之醢南象象南栗皆二籩並設也北上謂
菹與象也從獻之豆籩南陳而北上所以別於正豆
及鉶之西陳而東上也

饌黍稷二敦于階間西上藉用韋席

藉猶薦也謂先陳葦席
乃陳二敦於其上也

匱水錯于槃中南流在西階之南簞巾在其東

匱流解見士喪

禮陳
器

敎君善曰匱水匱中有水也所以沃盥自設洗至此具陳設之位與特牲饋食異者皆為變於吉也

陳三鼎于門外之右北面上設扃冑匕俎在西塾之西羞燔俎在內西塾上南順

門外之右在西方當塾之南也北面北上豕鼎在北次南魚鴈次南腊鴈皆北面也匕俎亦匕在俎上在西塾之西不饌於西塾上蓋在饗之東鼎之西也燔炙肉言羞見其非正俎也設於內西塾上當羞時則

升取之南順者以羞之者當北面縮執之也少牢下篇言縮執執酒俎之法當其下端然則縮執俎者其法同矣不言肝俎者肝先進此時亦設之設肝俎當在燔西使其先取之也

右陳饌具

附記

虞而立尸有几筵

虞沐浴不

櫛

鄭康成曰沐浴者將祭自潔清不櫛未在於飾也惟三年之喪不櫛期以下櫛可也

陳牲於廟門外北首西上寢右

言牲則腊在其中也陳之亦在

西方而當鼎之南畧如特牲禮也北首牲首在北也西上腊在東變於吉也腊用於寢右者牲以右體寢於下

日中而行事

教君善曰日中行事亦變於吉祭也

三虞皆然至祔乃質明殺於廟門西主人不視行事以其始用吉祭也

豚解

廟門西廟門外之西也主人視牲而不視殺喪事畧於儀也殺時豚解為四至熟時

乃體解為七而升於鼎也

羹飪升左肩臂臠肫骼脊脅離肺

膚祭三取諸左臠上肺祭一實於上鼎升魚鮓

鮓九實於中鼎升腊左胖髀不升實於下鼎皆

設扃鬻陳之

飪熟也特牲十一體此用七體賁於吉祭也膚祭三以為神祭臠胫

肉也肺祭一以為尸祭特牲魚十有五今用九亦賁於吉也腊亦七體牲之類也

鉶

芼用苦若薇有滑夏用葵冬用菹有杞

芼謂以菜雜肉

為羹也若苦若薇各隨其時之所有而用之也滑物之利潤者用以調羹也菹菜類乾則滑夏

秋用生葵冬春用乾薑
柶所以祭而嘗之也

豆實葵菹菹以西羸

醢籩棗烝栗擇

鄭康成曰棗烝栗擇則菹荊也
棗烝栗擇則豆不褐籩有籩也

祝俎髀短脊脅離肺陳於階間敦東

敎君善
曰此俎

實自鑊而經載於俎不復升於鬲者不敢與神
俎同也尸之俎用豕魚腊祝之俎實惟用豕者
亦變於吉也髀亦左髀也離肺膂肺也祝祭以
離肺者是禮主於飲故不因尸之食禮也階間
執事之俎所陳之常處也特牲禮云執事之俎
陳於階二列北上是也階間間先有黍稷敦故
記又明著
其所焉

主人及兄弟如羹服賓執事者如弔服皆即位于門外

如朝夕臨位婦人及內兄弟服即位于堂亦如之

教君善曰奠服主人髻髮衆主人及兄弟免而大功以上者皆散帶垂也弔服疑衰素冠麻經帶也如朝夕臨位主人及兄弟在東方賓執事者在西方也婦人及內兄弟其服亦如奠服其位亦如臨位婦人奠服經無所見蓋與既殯之服同

祝免澡葛經帶布席于室中東面右几降出及宗人即位于門西東面南上

澡葛經帶以澡治之葛為首經及帶也祝與宗人以公有司而助喪祭其服皆當弔服如麻但祝以接神宜少變故免而葛經帶馬免若過於重葛若過於輕輕重相準則與本服亦不甚相遠也當事則然既事

則已南上明與
賓不相統也

宗人告有司具遂請拜賓如臨入門哭婦人哭

告有司具遂請謂告主人以有司已具遂請行
祭事也臨謂朝夕哭拜賓如臨謂旁三拜也

主人即位于堂衆主人及兄弟賓即位于西方如反哭
位

反哭位主人升自西階東面衆主人堂下北面是也
教君善曰反哭之位乃因孝子一時之心而為之本
非正位自始虞至卒哭其位皆如之者蓋因此以別
於既祔以後吉祭之位也此正與婦人於既小飲有
作階上之位
者其意相類

祝入門左北面宗人西階前北面

祝入門左者門內之西祝之位也宗人西階前者立於此以詔主人及賓之事也

右即位

祝盥升取苴降洗之升入設于几東席上東縮降洗鬴
升止哭

東縮謂自西而東縱設之以西為上也祝既洗鬴升則執之以入俟時而酌亦異於吉也

主人倚杖入祝從在左西面

倚杖入康成謂倚杖西序乃入蓋虞杖不入於室也

贊薦脯醢醢在北

贊謂賓來助祭執事者也若賓不足則取於兄弟大功以下者斬齊之服不執事也醢在北豆南上也教君善曰主婦不設豆及敦未敢同於吉也

佐食及執事盥出舉長在左

佐食及執事皆賓之助祭者也舉舉鼎也長在左謂鼎在門外北面舉鼎時長者在西也故君善曰此云長在左下云佐食及右人載是佐食非長也乃先言之者以其有常職故耳鄭康成曰凡事宗人詔之

鼎入設于西階前東面北上匕俎從設左人抽肩髀匕

佐食及右人載

匕俎從設謂三人各兼執匕俎從鼎入而各設於鼎之東其設之法俎東順而匕西枋也佐食載則亦在右矣

卒匕者逆退復位

鄭康成曰復賓位也

俎入設于豆東魚亞之腊特贊設二敦于俎南黍其東稷設一鉶于豆南佐食出立于戶西贊者徹鼎

魚亞之魚俎又在豕俎之東也腊特腊俎特設於豕魚二俎之北也贊設敦鉶亦賓之執事者也設二敦於俎南黍敦在豕俎南稷敦在徹鼎反於門外也

祝酌醴命佐食啓會佐食許諾啓會卻于敦南復位

鄭康成曰復位
出立於戶西

祝奠饌于鉶南復位

鄭康成曰復位
復主人之左

右設饌

附記
四章

虞杖不入於室

主人在室則宗

人升戶外北面

鄭康成曰當
詔主人室事

載猶進祗魚進

髻

猶猶喪奠也教君善曰喪奠於牀則進祗魚
則進髻始者但以未忍異於生之故而為之

其後遂因之以別於吉祭故三虞
之時雖祭而不奠猶未變於初也

佐食無事

則出戶負依南面

戶牖之間謂之依佐食室中無正位故無事時則出而立

於此教君善曰依如負依之依亦謂如屏風者也然則自天子至於士其戶牖之間皆設依惟天子則飾以斧文耳特牲記云佐食當事則戶外南面無事則中庭北面此禮三獻而止佐食無中庭之位故但以事之有無為言雖當事猶云無也

主人再拜稽首祝饗

主人之拜以食具也祝饗以饗告神也

命佐食祭佐食許諾鉤袒取黍稷祭于苴三取膚祭祭如初祝取奠解祭亦如之不盡益反奠之主人再拜稽

首

教君善曰祭為神祭食也鉤袒蓋外卷其袂以出臂也為神祭當與尸祭異處故祭於席為其汚席故以苴藉之三者三祭之也每一祭畢則反取之取膚祭如初亦於苴三也神祭用膚亦別於尸也祝取奠解祭於苴亦三注之不盡者三祭而不盡其醴也既祭更酌而益之乃反奠於故處主人拜以饗禮成於祭也

祝祝卒主人拜如初哭出復位

祝祝卒謂祝祝神之辭畢也如初亦再拜稽首出復位復西階東面之位徐原一曰經言祝享不過祝以饗告神而未有辭至佐食代祭後始讀祝以告神故經言祝祝則必有辭無疑而記夙興夜處不寧云

云即告神
之辭也

右饗神

享神舊說謂之陰厭附記一章

始虞用柔日曰哀子某

哀顯相夙興夜處不寧敢用潔牲剛鬣嘉薦普

淖明齊溲酒哀薦祫事適爾皇祖某甫饗

柔日乙丁

己辛癸也奠以柔日即於奠日始虞而言用柔
日者對下三虞卒哭用剛日言也曰祝祝之詞
也哀子主人也哀顯相助祭者也不寧以形奠
於野神無所依而悲甚不安也剛鬣豕也嘉薦
菹醢也普淖黍稷也普大也淖和也言黍稷乃
天地太和之氣所生也明齊醴也郊特牲云縮
酌用茅明酌也又云明水沅齊貴新也蓋用明
水沅醴齊故曰明齊也溲酒溲釀之酒也治合

也始虞謂之禘事者以死者神既離散而欲其
萃合也適爾皇祖言神既萃合當祔之於祖也

饗勸之再虞皆如初曰哀薦虞事再虞後於始
饗也虞二日皆如

初者謂用柔日與祝辭也所異者祝辭不言三
禘事而言虞事蓋神既合矣欲其安之也

虞卒哭他用剛日亦如初曰哀薦成事他者教
君善謂

變易之辭猶言別也不用柔日而別用剛日謂
甲丙戊庚壬也三虞後於再虞二日皆如再虞

卒哭在三虞之明日其祝辭皆如初但易虞事
為成事耳成事者祭以吉為成虞祭尚凶祭禮

未成至卒哭之祭漸就於吉而成祭事記云卒
哭曰成事是日也以吉祭易喪祭是也萬充

宗曰先儒謂惟始虞再虞用柔日三虞與卒哭
皆剛日他不及時而葬者虞卒哭之間有祭其

祭無名謂之他者假設言之此說非也詳玩記
文始虞用柔日矣再虞皆如初包有三虞但又
未及三虞故於哀薦虞事下出三虞二字以足
之三虞不連卒哭讀他用剛日言別用剛日即
三虞之明日也檀弓云卒哭曰成事故其祝辭
曰哀薦成事如讀三虞連卒哭將三虞祝詞亦
同曰哀薦成
事矣而可乎

祝迎尸一人哀經奉篚哭從尸

尸神象也孝子不見親之形心無所係立尸以象之
一人哀經謂主人之兄弟也篚用以盛尸之饌者猶
吉祭之有所俎也賈公彥曰特牲少牢尸舉牲體
振祭齊之皆加於所俎此尸舉牲體振祭齊之皆實
於篚故此篚猶
吉祭之有所俎

尸入門丈夫踊婦人踊

賈公彥曰主人在西序東面衆兄弟在西階下亦東面婦人堂上當東序西面故主人與兄弟見尸先踊婦人後見尸故後踊也鄭康成曰尸入主人不降者喪事主哀不主敬也

淳尸盥宗人授巾

鄭康成曰淳沃也沃尸盥者賓執事者也故君善曰亦於入門左之位為之

尸及階祝延尸尸升宗人詔踊如初

延進也謂告之以升也如初如前之丈夫先婦人後也鄭康成曰言詔踊如初則凡踊宗人詔之

尸入戶踊如初哭止婦人入于房

教君善曰哭止將有事也祭禮婦人當在房前此在堂者以其有尸入之哭也今哭止故入於房及尸謦又復位而哭也

右尸入

附記三章

尸服卒者之上服

鄭康成曰上服者如特挂士玄

端也不以爵升服為上者祭於君之服非所以自配鬼神士之妻則宵衣耳

男男尸

女女尸必使異姓不使賤者

教君善曰女尸以在孫倫者之妻為

之據夫家而言之故曰異姓其或雖與卒者同姓亦可以為之也賤者孫倫之妻也

尸

入祝從尸

教君善曰入入門也言祝從尸嫌其如迎尸之時猶先行也祝始出迎尸

先行入門及尸入祝乃居後而從之入門如是則入戶亦從尸可知矣

淳尸盥

執槃西面執匱東面執巾在其北東面宗人授

巾南面

鄭康成曰槃以承棄水也執巾不授巾卑也教君善曰此執盥器者之面位

亦皆變於吉

主人及祝拜安尸尸拜遂坐

鄭康成曰安安坐也尸即至尊之坐或不自安故拜以安之教君善曰此皆變於其吉祭士之吉祭尸既坐主人乃拜安尸祝不拜

從者錯篚于尸左席上立于其北

賈公彥曰虞禮之篚象特牲之所俎所俎置於席北則此篚亦在席北以擬盛尸之饌也

尸取奠左執之取洎孺于醢祭于豆間

奠即祝所奠於鉶南之醵也右手取奠予左手執之以右手將有事也祭於豆間下文祭之類皆然

祝命佐食綏祭佐食取黍稷肺祭授尸尸祭之祭奠

教君善曰奠先執後祭皆尊之也綏鄭本作墮註云今文墮為綏教君善謂綏或是授字之誤當讀作

授今從之

祝祝主人拜如初尸嘗醴奠之

拜如初亦祝祝卒主人乃再拜稽首也尸既祭奠乃讀祝而勸之饗主人因拜尸乃嘗醴以示饗之也奠之復於故處也徐原一曰此祝祝乃讀祝以告尸記主為而哀薦之饗即告尸之辭也

佐食舉肺脊授尸尸受振祭齊之左手執之

手執曰舉肺為氣之主周人所尚脊則正體之貴者故先舉之振祭振之以祭也左手執之亦以右手將有事也賈公彥曰特牲禮舉肺脊在迺敦後此舉肺脊在迺敦前者彼吉祭吉凶相變故也左手執之以右手將祭銅嘗銅也救君善曰肺脊於此舉之明其不在舉數中也

祝命佐食迺敦佐食舉黍錯于席上

迺近也近之以便尸之食也

尸祭銅嘗銅

祭而嘗之亦用柶少牢禮云以柶祭羊銅遂以祭豕銅嘗羊銅是也此惟一銅則祭而嘗者皆豕銅耳

泰羹清自門入設于鉶南戴四豆設于左

泰羹清煮肉汁也不調以五味故謂之太羹言太古之羹也此惟一泰羹清謂豕肉汁也設於鉶南蓋饌北空處以待太羹也戴切肉也設於左謂設於正豆之北也教君善曰設清於右亦因食生之禮又以別於吉祭也庶羞惟用歲亦變於吉

尸飯播餘于筐

播餘於筐謂以飯之餘粒布之於筐也初飯即言播餘每飯皆然也鄭康成曰古者飯用手吉時播餘於會

三飯佐食舉幹尸受振祭齊之實于筐

幹長脅也舉幹以授尸尸受既齊而
佐食受之以實於篚也此一舉也

又三飯舉骼祭如初

此再
舉也

佐食舉魚腊實于篚

魚腊謂一魚及腊之骼也舉之亦以授尸尸不受乃
以實於篚鄭康成曰尸不受魚腊以喪不備味也
教君善曰此亦
不在三舉之數

又三飯舉肩祭如初

此三舉也始舉以脅次舉以骼終舉以肩牲體
備矣前體以肩舉其上也後體以骼舉其下也

舉魚腊俎釋三箇

佐食於魚俎又舉其五腊俎又舉其三亦以授尸而尸不受乃實於籩也箇猶枚也每俎各釋三箇腊體之在俎者亦臂臠肫也舉牲體不及臂臠肫舉魚腊必釋三箇皆君子不盡人歡不竭人忠之意且當以其饌改設於西北隅故也

尸卒食佐食受肺脊實于籩反泰如初設

九飯而卒食士之禮也大夫十一飯諸侯十三飯天子十五飯受肺脊受尸左手所執之肺脊也肺脊執之以卒食者蓋飯時當噉之也反泰者尸食時佐食舉黍錯於席上此尸卒食故反泰於本處也教君善曰尸九飯乃卒食雖與吉祭之數同然其間無告飽拜侑之事亦喪質威儀少也

右尸食

附記二章

尸坐不脫屨

教君善曰禮有敬事則不脫屨而坐

饗辭曰哀子某主為而哀薦之饗

此祝祝之之辭也主潔也

主人洗廢爵酌酒醕尸尸拜受爵主人北面答拜尸祭

酒嘗之

廢爵爵之無足者以喪去飾也北面答拜蓋於尸西北面答拜也持牲少牢禮尸拜受主人西面拜送而此北面答拜者變於吉也

賓長以肝從實于左縮右鹽

以肝從所以侑酒也縮謂肝於俎縱設之也鹽肝所宜故并設之右鹽鹽在肝之右畔也此左右據執俎

者言

尸左執爵右取肝擣鹽振祭臠之加于俎賓降反俎于

西塾復位

特牲少牢禮尸取肝既臠皆加於菹豆此加於俎
變於吉也復位復西階前衆兄弟之南東面位

尸卒爵祝受不相爵主人拜尸答拜

敖君善曰相爵者命主人拜送爵也特牲曰送爵皇
尸卒爵是也不相爵變於吉也雖不相爵而主人猶
先拜其節
宜然也

右主人酌尸

祝酌授尸尸以酢主人主人拜受爵尸答拜主人坐祭
卒爵拜尸答拜

尸必酢主人者禮無不答也不親酌者尸無降席之
禮故祝為酌之酢不洗爵尸尊也孝子於是時乃飲
而卒爵者為
尊者之賜也

右尸酢主人

筵祝南面

教君善曰筵祝蓋贊者也筵於北牖
下尊之西也鄭康成曰筵用萑席

主人獻祝祝拜坐受爵主人答拜

教君善曰祝與佐食皆事尸者也故於醕尸獻尸之後因而獻焉承已飲之後乃不洗而獻祝者下尸也坐受爵者因尸禮也以明其由尸而得獻也祝既受爵主人乃反西面位而答拜

薦菹醢設俎祝左執爵祭薦奠爵興取肺坐祭臠之興加於俎祭酒嘗之肝從祝取肝擣鹽振祭臠之加于俎卒爵拜主人答拜祝坐授主人

教君善曰菹醢亦贊薦俎亦佐食設之也祭薦亦右手以菹擣醢祭於豆間也先奠爵乃取肺以祭離肺用二手也祭不言絕文省也以肝從亦賓長也祝亦左執爵乃取肝不言之者同於尸可知也授主人下疑脫一爵字

主人酌獻佐食佐食北面拜坐受爵主人答拜佐食祭酒卒爵拜主人答拜受爵出實于篚升堂復位

祝尊故筵於北牖下南面而獻之佐食則於戶西北面酌以獻之而已獻祝有薦菹醢有俎有肝從獻佐食唯有爵而已主人答拜亦西面受爵出者主人受佐食之虛爵而出戶也實於篚升堂復位者康成謂此篚在庭既以爵降實於庭之篚乃升堂而復西階東面之位也

右主人獻祝佐食

主婦洗足爵于房中酌亞獻尸如主人儀

足爵爵有足者主婦於舅姑之喪稍輕故爵有足以飾也如主人儀如主人酌尸時尸拜受爵主人北面

答拜之儀也鄭康成曰昏禮
云內洗在北堂直室東隅

自反兩籩棗栗設于會南棗在西

反當讀作取教君善謂或是取字之誤

教君善曰自者明其不用贊也吉禮則宗婦贊之特牲云宗婦執兩籩戶外坐主婦受設於敦南是也

尸祭籩

教君善曰祭棗栗於豆間也亦祝取而授之特牲云祝贊籩祭尸受祭之是也

祭酒如初賓以燭從如初尸祭燭卒爵如初

如初謂如主人酌尸之儀賓謂次賓燭從如初如肝從之儀也

酌獻祝籩燭從獻佐食皆如初以虛爵入于房

皆如初謂獻祝
以下四事也

右主婦亞獻尸及祝佐食

賓長洗纒爵三獻燂從如初儀

鄭康成曰纒爵口足
間有篆文者彌飾也

右賓長三獻

婦人復位

鄭康成曰復堂上西面
位以尸將出當哭踊也

祝出户西面告利成主人哭皆哭

鄭康成曰西面告告主人也利猶養也成畢也言養禮畢也皆哭者丈夫婦人於主人哭斯哭矣

祝入尸謖從者奉篚哭如初

鄭康成曰謖起也祝入而無事尸則知起矣不告尸者無遣尊者之道也如初謂哭從尸

祝前尸出戶踊如初降堂踊如初出門亦如之

祝前前行以導尸也踊如初者康成謂出如入降如升三者之節悲哀同也其踊則皆婦人先丈夫後焉

右尸出

附記一章

尸謖祝前鄉尸還出戶又鄉尸還

過主人又鄉尸還降階又鄉尸降階還及門如

出戶

祝導尸必先嚮之還謂先鄉尸而即還也祝出戶而西南行主人在西階上過主人

則及階矣上降階者祝也下降階者尸也祝每鄉尸即還至降階時向尸則必俟尸已降階乃還以翼助之也鄭康成曰每將還必有避退之容凡前尸之禮儀在此

祝反入徹設於西北隅如其設也几在南扉用席

設於西北隅者亦以尊者之盛饌未可遽徹故改設於此也几在南在席之南也扉隱也於几之北稍隱暗之處設席也特牲禮佐食改設此祝改設亦變於吉也

祝薦席徹入于房祝自執其俎出贊闔牖戶

徹祝之薦席者贊也入於房則其初自房來矣闔牖戶以鬼神尚幽暗也

右改設

改設舊說謂之陽厭附記一章

尸出祝反入門左北面

復位然後宗人詔降

教君善曰尸出即反則不復前矣祝於門外迎尸而

不送亦終始異也詔降詔主人降也主人於是乃取杖歎

主人降賓出主人出門哭止皆復位

出出殯宮門也復位謂復門外未入時之位

宗人告事畢賓出主人送拜稽顙

出出大門也送亦送於大門外送此賓亦稽顙者雜記云朋友虞祔而退此助虞祭之賓皆親之執友既送奠又助虞祭故重拜以謝之也

右事畢

附無尸饗祭及卒哭附練祥禫共十四章

無尸則禮及薦饌

皆如初

禮謂享神以前及改設以後之儀節也薦饌謂神席前俎豆之類如初謂與有

尸者

既饗祭於苴祝祝卒不綏祭無泰羹湑載

從獻主人哭出復位祝闔牖戶降復位於門西

男女拾踊三

祭於苴謂饗神時佐食取黍稷祭於苴也祭於苴祝祝卒饗神時事

與有尸同也既享神其禮有不同者如下文所云也綏祭謂佐食授祭也無尸則固無所授矣

從獻謂遽及肝燭俎也事尸之禮始於授祭終於從獻其間太羹湑及載皆為尸而設今無尸

故闕此四事也既無尸無上四事故祝祝卒主人即哭出復西階東面位而祝遂闔牖戶復門

西北面位是時婦人亦在堂故更迭而踊婦人不入於房亦與有尸者異也如食間

祝升止哭聲三啓戶主人入祝從啓牖鄉如初

主人哭出復位

如食間如尸九飯之頃象神既食畢祝乃升而入蓋將徹也聲

三謂三有聲以警覺神欲使神知將啓戶也鄉教若善謂猶面也鄉如初謂祝在主人之左皆

西向也復位

復堂上位也卒徹佐食降復位宗人詔降如初

教君善曰此徹亦改設於西北隅不言之者以前已蒙如初之文也卒徹乃與佐食俱降佐食

於此方云復位則其前蓋在中庭北面歟士之佐食位在兄弟之列特牲記云佐食於旅齒於

兄弟是也宗人詔降如初但言其與有尸者之節同而已

士三日而殯三

月而葬遂卒哭

遂卒哭者遂於葬月卒哭也士三虞不過五日至六日即行卒

哭祭是士之卒哭即在葬月也若大夫五虞五
月而卒哭諸侯七虞七月而卒哭天子九虞九
月而卒哭則卒哭不在葬月矣
此下四章言卒哭祭之禮

卒辭曰哀子

某來日某齊祔爾於皇祖某甫尚饗

鄭康成曰卒辭卒哭

之祝辭齊升也尚庶幾也

女子曰皇祖妣某氏婦曰孫婦於

皇祖姑某氏其他辭一也

賈公彥曰女子謂女未嫁而死或出歸而

死既葬祔於祖母也祔女子云來日某祔爾於
皇祖妣某氏尚饗其孫婦云來日某齊祔孫婦

於皇祖姑某氏尚饗

獻畢未徹乃餞

鄭康成曰卒哭之祭既三獻也餞送

行者之酒尸明旦將始祔於皇祖是以餞送之
教若善曰餞尸於外者神將適其祖而送之也

尊兩甒於廟門外之右少南水尊在酒西勺北

枋

鄭康成曰少南以將有事於其北也教君善曰是禮主於尸故惟用酒耳用酒而有水尊

尊者之禮也水尊在酒西西上也

洗在尊東南水在洗東篚在

西

篚在洗之西也

饌籩豆脯四脰有乾肉折俎二尹縮

祭半尹在西塾

饌籩豆主於飲也脰直也乾肉折俎以牲體乾者折之為俎實

也尹正也雖折之亦必使正也二尹云縮則祭半尹橫矣在西塾謂三者饌於外面塾上之南

籩豆在俎之北也

尸出執几從席從尸出門右南面

鄭康

成曰祝亦告利成入尸乃出几席素几葦席也以几席從謂執事者也南面俟設席也按他

時尸出門則歸而此於門右南面立者蓋執事以几席從則尸固知有餞尸之禮矣故立焉以俟其設席也

席設於尊西北東面几在南

几在南在席之南也

賓出復位

鄭康成曰將入臨之位

主人出即位於門東少

南婦人出即位於主人之北皆西面哭不止主人

位少南者以婦人當位於其北也衆主人之南在主人其婦人之位則南上也其哭不止者明其皆哭而出也尸即席坐惟主人不哭洗廢爵酌獻尸

尸拜受主人拜送哭復位

教君善曰惟主人不哭為將行禮也然則

亞獻三獻時主婦賓長亦不哭特於此見之也主人拜送蓋亦北面如室中之儀

薦脯

醢設俎於薦東胸在南尸左執爵取脯孺醢祭

之佐食授齊尸受振祭齊反之祭酒卒爵奠於

南方主人及兄弟踊婦人亦如之

胸脯及乾肉之屈中者也

祭亦祭於籩豆之間授祭授乾肉之祭也以其

當齊故即以齊名之反之謂反於佐食而佐食

反之於俎也南方薦之南也

廖百子曰凡脯

中者為臠屈者為胸賈公彥曰按曲禮云以脯

脩置者左胸右末則吉時屈者在左今尸東面

而云胸在南則凶禮屈者在右末頭在左變於

吉也教君善曰卒爵而主人主婦洗足爵亞獻

不拜且奠之而不酢皆畧也

如主人儀無從踊如初賓長洗纔爵三獻如亞

獻踊如初佐食取俎實於筐

無從謂無從獻者如磻之類也取俎

謂取俎中之乾肉也

尸謾從者奉篚哭從之祝前哭者皆

從及大門內踊如初尸出門哭者止

教君善曰哭者皆從

尸者主於餞尸則宜送之亦男先女後不拜者凡主人於尸無拜送之禮惟大夫賓尸乃拜送之賈公彥曰從尸不出大門者猶廟門外無事尸之禮也在廟以廟為限在寢門外以大門為限正祭在廟廟門外無事尸之禮今餞尸在寢門外則大門外無事尸之禮

賓出主

人送拜稽顙

鄭康成曰送於大門外

主婦亦拜賓

主婦拜女賓蓋

在大門之內於女賓將升車之時而拜之也

丈夫說經帶於廟門外

鄭康成曰既卒哭當入徹主人不與入徹謂兄

下者也主人不與蕙丈夫婦人言之也賈公彥曰平常祭時諸宰君婦廢徹不遲則凶祭丈夫

婦人亦在但斬婦人說首經不說帶教君善曰哀不與徹耳

服之親言既徹乃說經下丈夫也不說帶則不以葛易之傳云男子重首婦人重帶蓋婦人質

故於其所重者有除無變其三年者至小祥而除之齊衰期至小功皆終喪而除之檀弓云婦

人不葛帶是也其總麻者此時亦不說既退則除之焉無尸則不餞猶出

几席設如初拾踊三哭止告事畢賓出餞尸本為送神

故雖無尸猶出几席設如初送神不異也丈夫婦人亦從几席而出故於既設後為之拾踊其

賓出以下之儀
與有尸者同

將旦而祔則薦

三虞之明日既行卒哭之

祭而餞尸於廟門外矣於其夕也復於寢之室設薦禮焉而告之以來日旦明當祔於廟也教君善曰將以來日旦明祔神靈於廟則是夕復薦於寢而告之薦謂薦脯醢而奠酒也惟主告神以祔期耳

明日以其班祔

鄭康成曰卒哭之明日也凡祔

已復於寢練而後遷廟

沐浴櫛搔翦

賈公彥曰虞沐浴櫛彌自飾

也用專膚為折俎取諸胙臠

專猶厚也肉無骨曰膚折俎主婦以

下俎特牲記云主婦俎散折佐食俎散折少牢云主婦俎臠折蓋吉祭時折體骨以為俎此以專膚為俎取諸胙臠不分左右皆用之矣此折俎謂尸祝

之外凡執事者之俎也。昨俎亦存焉。有此俎則有致爵獻賓之禮矣。小祥練祭而不旅奠酬於賓賓弗舉然則祔祭其無奠酬之事與。折俎不用體骨者祔未純吉猶以左胖為神俎其右胖之體骨則不敢以為執事者之俎。其他如饋食實蓋避吉祭神俎之所用者也。其他謂陳設之位與事神事尸之儀及執事者也。如饋食如特牲饋食之事。徐原一曰特牲饋食是士常祭之禮。今祔祭亦用之者蓋卒哭既為吉祭則祔之為吉祭可知。故亦得倣而行之。但虞不致爵小祥不旅酬祔則得致用嗣尸爵而不得旅酬亦自凶而趨吉之漸也。

曰孝子某孝顯相夙興夜處小心畏忌不惰其身不寧用尹祭嘉薦普淖普薦漶酒適爾皇祖

某甫以齊祔角孫某甫尚饗

嗣繼也即虞卒哭之尸相繼用之以

哀未殺未暇筮尸也及練祥則筮尸矣稱孝者吉祭也小心畏忌不惰言中心之敬不敢稍怠

也其身不寧言敬形於身踧踖而不安也尹祭脯也鄭康成謂大夫士祭無云脯者今不言牲

號而云尹祭記者誤也然則亦當云敢用潔牲則鬣歟普薦釔羹也虞禮一釔此與特牲同用

二釔適爾皇祖某甫以告祔者齊祔爾孫某甫以告皇祖欲其祔合故兩告之也此下四章

言祔祭之事

男子祔於王父則配女子祔於王母

則不配

鄭康成曰配謂并祭王母不配則不祭王父也有事於尊者可以及卑有事於

卑者不敢援尊配與不配祭饌如一祝辭則異不言以某妃配某氏耳按此則上章皇祖某

甫以字下疑脫某
妃配某氏五字

婦祔於祖姑祖姑有三人

則祔於親者

祖姑舅之母也舅有三母或二繼或前一繼是祖姑有三人也惟

從舅姑所生者而祔之親親也

祔杖不升於堂期而小祥

曰薦此常事

小祥祭名三年之喪十三月而小祥其祝辭與祔辭同但云薦此常

事為異耳言常事者小祥其祭彌吉漸與常事相同也

又期而大祥曰薦

此祥事

大祥亦祭名三年之喪二十五月而大祥祥吉也其祭漸與吉祭一也此下

四章言練祥之祭

練筮日筮尸視濯皆要絰杖繩屨

有司告具而后去杖筮日筮尸有司告事畢而

後杖拜送賓

練小祥祭也要經葛之要經也小祥除首經而要經及杖未除是時

又以卒哭後冠七升布為衰裳謂之功衰以其與大功七升之衰同也更以八升布為冠以大功繩屨屨易黼屨將欲祭則預著小祥之服以臨筮日筮尸視濯三事也有司告具謂執事者告白三事皆辨具也去杖臨事而致敬也告事畢而後杖拜送賓者筮日與尸皆有賓來向當臨事時去杖今筮事畢乃更執杖以拜送賓也視濯無賓故不言也

大祥吉服而

筮尸

吉服朝服也不言筮日視濯者從同也

小祥之祭主人之

酢也濟之衆賓兄弟皆啐之大祥主人啐之衆

賓兄弟皆飲之可也

鄭康成曰濟啐皆嘗也濟至齒啐入口孔仲達曰主

人之酢嘏之者謂正祭後主人獻賓長賓長酢
主人主人受酢則嘏之也衆賓兄弟則皆啐之
者謂衆賓及兄弟祭末受獻之時啐之也士虞
禮主人主婦獻尸受酢之時皆卒爵蓋神惠為
重故受尸酢雖虞亦卒爵行禮為
輕故受賓酢雖小祥但嘏之也 小祥主人

練祭而不旅奠酬於賓賓弗舉大祥舉酬行旅

小祥之祭著練冠練中衣故謂之練祭不旅者
不旅酬也奠酬於賓賓弗舉謂主人酬賓奠酬
於薦北賓取解奠於薦南弗舉以旅酬也大祥
則可旅酬矣但不得如饋食之無奠爵耳鄭
康成曰奠無尸虞不致爵小祥不旅酬大祥無
奠爵彌吉也徐原一曰大小祥祭之禮皆如特
牲饋食其異者惟小祥
不旅酬大祥無奠爵耳 中月而禫鄭康成曰
中猶間也

禫祭名也與大祥間一月自喪至此凡二十七
月也禫之言澹澹然平安意也徐原一曰禫
祭之禮全用特牲饋食之儀蓋小祥不旅酬大
祥無無算爵禫則既行旅酬又加以無算爵一
如特牲禮是月也吉祭猶未配吉祭謂禫祭後
行之也擇日而祭於廟以安之也猶未配其祝詞猶未
言以某妃配某氏也故君善曰孝子之母雖先
其父而卒此時猶未以之配祭蓋此祭主於安
其父之神靈故不及其母與所謂薦其歲事者
不同也

禮經本義卷十四

欽定四庫全書

經部
禮經本義卷十五

詳校官監察御史臣陳化龍

給事中臣溫常綬覆勘

總校官原任中允臣王燕緒

校對官中書臣李荃

謄錄監生臣馮士新

欽定四庫全書

禮經本義卷十五

吉禮

特牲饋食禮

此士祭祖禰之禮特牲一豕也士祭用三鼎乃以特牲名者牲為主也不曰祭而曰饋食者祭以菜盛焉重也孝子養親曰饋養昏禮婦饋特牲以明婦順不曰祭而曰饋食事死如生之義也士喪遠莫用羊豕是士之祭亦有用少牢者蓋特牲其常而少牢乃其盛禮也 郝仲與曰

無錫蔡德晉撰

士虞後繼以特牲者自凶趨吉也
特牲後繼以少牢者自殺趨隆也

不諏日

諏謀也諏日謂諏其筮日之日也少牢禮諏日用丁
已筮旬有一日是也尊者禮詳必先諏日而後筮界
者禮畧不先諏日
有暇則筮其日也

及筮日主人冠端立即位于門外西面子姓兄弟如主
人之服立于主人之南西面北上有司羣執事如兄弟
服東面北上

冠端立冠與端皆立色也門外廟門外西面立主位
也子姓猶言子孫也有司羣執事公臣私臣之供筮

事者也東面賓位也此時未有賓故有司羣執事皆如賓位

席于門中闌西闕外

鄭康成曰為筮人設之也

筮人取筮于西塾執之東面受命于主人宰自主人之

左當作右贊命命曰孝孫某筮來日某諏此某事適其皇

祖某子尚饗

士冠禮筮策饌于西塾故筮人就西塾取之執亦抽上韜魚執之也宰有司之長來日某謂若丁巳之日也某事即歲事也不言歲事而言某事者于春夏或言祠事禴事秋冬或言嘗事烝事也適謂主人適其

廟而祭之也皇大也某子祖謚也稱其謚蓋指大夫之為祖者言也亦假設之辭耳尚饗謂日若吉庶幾其神饗之也教君善曰不言以某妃配變于大夫之筮辭也若其祝辭則亦當言之

筮者許諾還即席西面坐卦者在左卒筮寫卦筮者執以示主人主人受視反之筮者還東面長占卒告于主人占曰吉

卦者寫卦者也在左在筮人之南長占占卦先長以次及眾也占曰吉告主人之辭

若不吉則筮遠日如初儀

張子曰祭之筮日若再不吉則但誦日而祭更不筮據禮惟有筮遠日之文不云三筮筮日之禮止有二

筮先筮近日後筮遠日不從則直諏用下
旬遠日蓋亦足以致聽于鬼神之意矣

宗人告事畢

亦如士冠禮徹
筮席乃告也

右筮日

前期三日之朝筮尸如求日之儀

前期三日容宿賓視滌濯也如求
日之儀魚若不吉而改筮者言

命筮曰孝孫某諏此某事適其皇祖某子筮某之某為

尸尚饗

某之某字尸父而名尸也尸必筮無父者為之字尸父亦所以尊鬼神也

右筮尸

乃宿尸

宿越宿預戒也
蓋在祭前二日

主人立于尸外門外子姓兄弟立于主人之後北面東
上尸如主人服出門左西面主人避皆東面北上主人
再拜尸答拜

主人親宿尸子姓兄弟皆從往重其禮也北面事神之禮出門左西面迎賓之禮主人避者將以為尸故

先却避而不敢居賓主之禮也
東面向尸也主人先拜尊尸也

宗人擯辭如初卒曰筮子為某尸占曰吉敢宿祝許諾
致命尸許諾主人再拜稽首

宗人為嬴以相禮而致辭于祝如初者如筮尸宰贊
主人命筮之詞卒語末也語末以筮子為某尸占曰
吉敢宿祝前筮某之某為尸尚饗餘語並同也祝受
宗人辭許諾遂致主人之命于尸而尸許諾宗人因
受于祝而告主人也拜稽首尊尸也尸既許諾則成
為尸故不答拜高紫超曰尸不禮辭者為尸重典
不可以筮吉而苟易故也

尸入主人退

尸不拜送尸尊也 教君善曰尸有祖道故不俟主人之退而先入見其尊亦變于大夫尸也先入而不揖避君禮也聘禮公與羣臣夕幣乃揖而先入少牢云主人退賓送揖不拜

右宿尸

宿賓賓如主人服出門左西面再拜主人東面答再拜

賓戚友也宿一人為從獻之賓 高紫超曰古人祭祀必立賓者欲其代主人而娛尸賓之來也亦若為助祭執事之意故主人醕尸而賓長以肝從主人致爵主婦而後獻于賓以其皆以養尸為主而意不重于賓故也此賓疑亦是主人甥舅之戚非外賓

宗人擯曰某薦歲事吾子將莅之敢宿賓曰某敢不敬

從主人再拜賓答拜

歲事每歲時祭之事言吾子將蒞之是向者賓既許之矣然則筮日後亦當有戒賓之儀如士冠禮而經

文不具

見耳

主人退賓拜送

右宿賓

厥明夕陳鼎于門外北面北上有竈櫨在其南南順賓獸于其上東首牲在其西北首東足

厥明宿賓之明日祭前之一日也北上三鼎自北陳而南也櫨形似箱所以載物者南順向南直陳也獸

腊也野禽已殺者兕屬也牲豕也北首東足未殺束縛之也

設洗于阼階東南壺禁在東序豆籩鉶在東房南上几

席兩敦在西堂

設洗于阼階東南在堂下壺有禁在堂上東序豆籩鉶虛器未賓者在東房几席用以安神而猶未布兩敦用以盛黍稷而猶未賓皆在西堂謂西夾室之前堂也

主人及子姓兄弟即位于門東如初賓及衆賓即位于

門西東面北上宗人祝立于賓西北東面南上主人再

拜賓答再拜三拜衆賓衆賓答再拜

教君善曰衆賓答一拜言再者字誤

也

門東廟門外之東也如初如筮位也賓及衆賓皆主人所宿以助祭者宗人及祝立賓西北稍退居賓後也以南為上宜變于賓也主人于賓再拜賓答亦如之于衆賓輩共三拜衆賓止答一拜以答者衆也

主人揖入兄弟從賓及衆賓從即位于堂下如外位

鄭康成曰為視濯也高紫起曰視濯省牲之類不惟主人親之而且使賓與衆賓監視之敬之至也

宗人升自西階視壺濯及豆籩反降東北面告濯具

不言數銅几席省文也濯具所濯者已備具也

賓出主人出皆復外位

鄭康成曰
為視牲也

宗人視牲告充饗正作豕宗人舉獸尾告備舉鼎鼐告

潔

充肥也饗正饗人之長作豕謂以策作之使動而視其聲氣之和也若聲氣不和即是疾病不堪祭祀矣
告備言腊之體完全而無損
缺也 鄭本饗作雍潔作絜

請期曰羹飪

請期請明日祭之早晏羹飪謂以
煮肉熟為節蓋明日質明時也

告事畢賓出主人拜送

右視濯視牲為期 設洗南北以堂深東西當

東滌水在洗東篚在洗西南順實二爵二觚四

觶一角一散

鄭康成曰二爵者為賓獻爵止主婦當致也二觚長兄弟酬眾長為

加爵二人班同宜接並也四觶一酌奠其三長兄弟酬賓卒受者與賓弟子兄弟弟子舉觶于其長禮殺事相接也記言貴者獻以爵賤者獻以散尊者舉觶卑者舉角舊說爵一升觚二升觶三升角四升散五升 壺於禁饌于東序南順覆兩壺焉

蓋在南明日卒奠冪用綌即位而徹之加勺

禁 枨

承酒尊之器其形似箱者兩壺一盛酒一盛玄酒倒置枨上曰覆以滌餘水且為其不宜塵也

卒奠酌奠于銅南時
即位尸即席坐時也

夙興主人服如初立于門外東方南面視側殺

側特也特殺
殺一牲也

主婦視饌饗于西堂下

炊黍稷曰饌宗婦為之覺竈也在西壁東面高紫
超曰主人視側殺主婦視饌饗所謂共承宗廟內外
之義陰陽
之分然也

烹于門外東方西面北上羹飪實鼎陳于門外如初

烹煮肉于鑊也豕魚腊各一爨以北為上羹飪肉熟
也實鼎各自其鑊而升于其鼎也如初如前夕之陳

鼎北而北上也 高紫超曰
此時尸俎當隨鼎而設之

尊于戶東玄酒在西

戶東室

戶之東

實豆籩鉶陳于房中如初

前此豆籩鉶之屬皆虛設至此則以脯醢
和羹果蓏之屬實而設之如初設南上也

執事之俎陳于階間二列北上

執事與祭者皆有俎陳于兩階間分為二列東西相
並自北陳而南也 高紫超曰此時尸俎之外凡有
十三俎主人俎也主婦俎也祝俎也佐食俎也實俎
也長兄弟俎也宗人俎也衆賓俎也衆兄弟俎也內

賓俎也宗婦俎也公有司俎也私臣俎也蓋皆得以執事名之者也

盛兩敦陳于西堂藉用萑几席陳于西堂如初

兩敦一盛黍一盛稷祭之所以為主者也盛之者亦宗婦也萑細葦

尸盥匱水實于盤中簞巾在門內之右

設盥水及巾尸尊不就洗也置巾于簞故曰簞巾門內之右舊說東為右也凡向內以入為左右向外以出為左右郝仲興則云以西為右未詳孰是

右烹饔陳設 牲饗在廟門外東句南魚 腊

饗在其南皆西面饔饗在西壁 肝俎心舌皆

去本末午割之實于牲鼎

肝俎尸食俎實以牲心右貴之也午割縱

橫割不
斷也

邊巾以綌也纁裏棗烝栗擇鉶芼

用苦若薇皆有滑夏葵冬菹

祝筵几于室中東面

此設神几席也室中東面
布于室西南隅之奧也

主婦纁笄宵衣立于房中南面

纁以韜髮笄簪也宵衣
黑色衣詳見士昏禮

主人及賓兄弟羣執事即位于門外如初宗人告有司

具主人拜賓如初揖入即位如初佐食北面立于中庭
郝仲興曰佐食佐尸食者以眾兄弟為之立于中庭以俟事也尸將升堂則佐食中庭北面室中當事則戶外負依南面不與眾有司混處敬神事也

右筵几即位

主人及祝升祝先入主人從西面于戶內

祝先入室主人從入西面向神席立室戶內也

主婦盥于房中薦兩豆葵菹蜎醢醢在北

房中東房中也兩豆一菹一醢取自東房入薦于室醢設席北菹在南南為上也

宗人遣佐食及執事盥出主人降及賓盥出主人在右
及佐食舉牲鼎賓長在右及執事舉魚腊鼎除羝宗人
執畢先入當阼階南面鼎西面錯右人抽扃委于鼎北

宗人主以禮事遣佐食與執事者盥手出門外助主
人及賓舉鼎宗人亦出主人與賓皆盥手出舉鼎自
外入東為右神事尚右也每鼎二人舉尊者任右主
人賓長皆右畢鄭康成謂狀如又蓋為其似畢星取
名焉主人親舉宗人則執畢導之邾仲與謂畢笏類
執以指錯鼎者未詳孰是鼎西面錯當阼階之西也
右人主人及二賓也高紫超曰此主人之祭共鼎
三牲鼎也魚鼎也腊鼎也所謂士祭以三鼎者也鼎
必主人親舉者敬也大夫則使士舉
之賓代主人娛尸故亦為魚腊鼎

贊者錯俎加匕乃匕佐食升肝俎鼐之設于阼階西卒載加匕于鼎

錯俎錯之于鼎西加匕加之于俎上肝俎載心舌之俎傳云肝之為言敬也以主人敬尸而設此俎也心舌亦飪之鼎內佐食載之于肝俎卒載謂三鼎之實盡升之于俎也

主人升入復位俎入設于豆東魚次腊特于俎北

復位復戶內西面之位俎入謂俎自阼階而入陳于室中尸位之前也豕俎先入並葵菹東魚俎次豕東腊俎獨在魚北無並曰特

主婦設兩敦黍稷于俎南西上及兩鉶芼設于豆南南

陳

黍在豕南稷在豕東魚南黍在西為上也兩銅茅接葵菹而南

祝洗酌奠奠于鉶南遂命佐食啓會佐食啓會卻于敦南出立于戶西南面

鄭仲興曰祝下堂洗爵升堂酌酒于戶東入室奠于兩鉶南少牢禮啓會乃奠之

主人再拜稽首祝在左卒祝主人再拜稽首

鄭仲興曰主人再拜稽首尸未入拜神也祝在左致辭達主人之誠卒祝祝畢主人又再拜稽首敬之至也

右設饌饗神

尸俎右肩臂臠肫胙正脊二骨

橫脊長脅二骨短脅膚三離肺一扞肺三魚十

有五腊如牲骨

尸俎神俎也吉牲尚右故用右肩肩下為臂臂下為臠肫股骨

也胙足骨也特牲無膚俎故以膚附于牲俎離肺肺割未絕者所謂舉肺也扞肺肺以扞斷者所謂祭肺也此十一皆豕俎也魚俎用魚十五尾腊俎如牲骨但無膚與肺耳

肝俎

載心立舌縮俎

心則立于俎內舌則順俎而直設之此載肝俎之法也

棘心已刻

已以棘心為之刻康成謂刻為龍頭也喪已用桑吉已用棘

佐

食當事則戶外南面無事則中庭北面凡祝呼

佐食許諾

呼猶命也

祝迎尸于門外主人降立于阼階東

高紫超曰主人降立蓋端拱以候神也不親迎尸者尸必入廟始全乎尊也

尸入門左北面盥宗人授巾

少牢禮祝先入門右尸入門左

尸至于階祝延尸尸升入祝先主人從

少牢禮尸升自西階入祝從主人升自阼階祝先主人從

右尸入尸入主人及賓皆避位出亦如之

沃尸盥者一人句奉槃者東面句執匱者西面

淳沃句執巾者在匱北宗人東面取巾振之三

句南面授尸句卒句執巾者受

澆灌曰沃細瀉曰淳振謂揮振

之以致潔也三三振南面授尸尸北面盥也受受巾以實于篚也

尸即席坐主人拜妥尸尸答拜執奠祝饗主人拜如初

執奠尸取祝所奠銅南解執之也祝饗之辭舊說孝孫某主為而明薦之饗是也主人拜祈享也如初再

拜稽首也

祝命授

當作授字之誤也

祭尸左執觶右取菹換于醢祭于豆

間

敖君善曰祝命佐食授尸祭尸
于是祭薦欲及其授祭之節也

佐食取黍稷肺祭授尸尸祭之祭酒啐酒告旨主人拜
尸奠觶答拜祭鉶嘗之告旨主人拜尸答拜

肺祭肺刳切以祭者尸告旨而主人拜拜尸享也
高紫起曰尸告旨者主人肥潔牲酒以享神未知神
之果馨其味否故啐酒嘗鉶
告其美以安主人之心也

祝命邇敦佐食邇黍稷于席上設太羹湑于醢北

敖君善曰此湑為尸設乃在左者以其居神
位故變于常禮也虞禮湑在右者喪祭也

舉肺脊以授尸尸受振祭齊之左執之乃食食舉

高紫超曰乃食謂尸飯也
食舉者食所舉之肺脊也

主人羞所俎于腊北

羞進也所俎在阼階西主人親取
而進設之于腊俎北敬之至也

尸三飯告飽祝侑主人拜

侑勸也勸之使又食也主人拜亦以勸尸食也勸食
而拜敬之至也教君善曰此祭以饋食為名故當
食而尸尤尊雖主人拜亦不答也

佐食舉幹尸受振祭齊之佐食受加于所俎舉獸幹魚

一亦如之尸實舉于菹豆

加于肝俎猶虞祭皆實于簠也獸幹脂幹也實舉于菹豆者前所舉肺脊尸食之不盡者則以實之于菹

豆也此
一舉也

佐食羞庶羞四豆設于俎南上有醢

四豆鄭康成謂曉炙載醢南上者以曉炙為上也教君善謂少牢禮羞兩載兩醢此亦當倣之南上者載醢相間兩載各在醢之南也未詳孰是

尸又三飯告飽祝侑之如初舉胈及獸魚如初

獸謂胈
此再舉也

尸又三飯告飽祝侑之如初舉肩及獸魚如初

獸謂腊肩此三舉也高紫超曰按尸自既入之後始啐酒繼嘗鉶繼食肺脊食幹食骼食肩而獸與魚復佐之而黍稷之飯凡三者三則尸之厭飲可知也

佐食盛胾俎俎釋三个

佐食取牲魚腊之餘成于胾俎將以歸尸俎也釋猶留也每牲之俎但留三个以待改設其餘盡入胾俎以歸尸也所釋三个鄭康成謂長脊長脅及肱教君善謂正脊長脅短脅以少牢禮惟釋脊脅推之疑教氏為是

舉肺脊加于胾俎反黍稷于其所

肺脊在菹豆佐食取而加之于胙俎黍稷迺
于席上今復置之于銅東以尸食禮已畢也

右尸食

主人洗角升酌醕尸尸拜受主人拜送尸祭酒啐酒賓
長以肝從尸左執角右取肝揆于鹽振祭齊之加于菹
豆

醕不用爵而用角下于大夫
也置肝于菹豆吉禮當然也

卒角祝受尸角曰送爵皇尸卒爵主人拜尸答拜

送爵命主人拜送爵也皇尸卒爵言皇尸已卒爵矣
告以送爵之節也尸卒爵而不拜既爵乃俟主人先

拜者尊尸也 此
以上主人酌尸也

祝酌授尸尸以酢主人主人拜受角尸拜送主人退佐

食授接祭主人坐左執角受祭祭之祭酒啐酒進聽嘏

主人退者進受角而退復位也授祭取黍稷肺祭以
授主人也受福曰嘏進聽嘏者尸傳神意致福嘏于
主人主人因進于尸
前而聽其嘏辭也

佐食搏黍授祝祝授尸尸受以菹豆執以親嘏主人主

人左執角再拜稽首受復位詩懷之實于左袂掛于季

指卒角拜尸答拜主人出寫嗇于房祝以籩受

搏黍程黍飯成團也黍貴于稷尸食唯黍故獨搏黍尸親嘏者愛其子孫之甚也其嘏辭見後少牢饋食禮但彼祝傳尸嘏此尸親嘏則辭之首當與彼異也詩鄭康成謂承也鄭仲興謂詩序云詩者志之所之內則云詩負之言專志也未詳孰是懷藏也掛猶挈也李指小指也以左手小指挈其左袂恐其黍之瀉而出也瀉傾也耆即黍也以遷受所寫黍重神貺也此以上尸酢主人而親嘏之也

右主人酌尸尸酢主人

筵祝南面主人酌獻祝祝拜受角主人拜送設菹醢俎祝左執角祭豆興取肺坐祭臠之興加于俎坐祭酒啐酒以肝從祝左執角右取肝揔于鹽振祭臠之加于俎

卒角拜主人答拜受角

角即獻尸之角獻尸後即獻祝與佐食者祝接神
佐食接尸主人所尊故先獻之也此獻祝也

酌獻佐食佐食北面拜受角主人拜送佐食坐祭卒角
拜主人答拜受角降反于篚升入復位

鄭仲興曰角實于篚在堂下既獻反之升入升堂入
室復戶內西向之位佐食獨不設俎者以兄弟為之
其薦俎啗于兄弟中于後獻衆
兄弟時并設也此獻佐食也

右主人獻祝佐食祝俎脾臠脊二骨脇二骨

膚一離肺一

脾尾骨也臠直也臠脊
即正脊也脇代膚也

主婦洗爵于房酌亞獻尸尸拜受主婦北面拜送宗婦
執兩籩戶外坐主婦受設于敦南祝贊籩祭尸受祭之
祭酒啐酒兄弟長以燔從尸受振祭齊之反之羞燔者
受加于所出尸卒爵祝受爵命送如初

變角稱爵更器也北面拜送變于主人之西面也宗
婦同宗之婦來助祭者春官職有內宗外宗皆是也
兩籩棗栗也執之跪于戶外而不入室主婦受之入
設于黍稷南祝贊尸以籩之棗栗祭于豆間兄弟長
以燔從謂兄弟之長者以燔肉實于俎從主婦薦尸
也反之反于俎也羞燔者受加于所謂兄弟長受所
反之燔加之于所俎上也出執虛俎出反門外西塾
也祝命送命主婦拜送爵如前主人酌尸之儀也

高紫超曰士虞禮主婦獻尸賓以燭從此則以兄弟長者吉禮男女有別不便于賓黨故也

酢如主人儀主婦適房南面佐食授祭主婦左執爵右撫祭祭酒啐酒入卒爵如主人儀

酢如主人儀謂尸酢主婦亦祝酌授尸尸授主婦拜受尸拜送皆與酢主人儀同也主婦不祭于室適東房南面雖祭而男女內外之位不相褻雜也佐食授祭置黍肺于席主婦以手撫之不振祭也遂祭酒啐之及入室北面卒飲如主人儀謂卒爵拜尸答拜也卒爵必于室者承神之貺當面卒之拜受拜既禮貴有終故也

右主婦亞獻尸尸酢主婦

獻祝遽燔從如初儀

獻祝主婦受尸酢卒爵更洗于房而后酌以獻祝也
以燔從者兄弟之衆也初儀即主人獻祝之儀遽與
豆燔與肝雖
異其祭一也

及佐食如初卒以爵入于房

教君善曰及謂獻及之初者亦主人獻佐食之儀
少牢禮主婦獻祝及佐食皆西面于主人之北答拜
之

右主婦獻祝佐食

賓三獻如初燔從如初爵止

此賓三獻尸也如初拜受拜送如前二獻之儀也執事者以燭從賓獻亦如前二獻之儀爵止者賓所獻爵尸奠之而不舉蓋三獻禮成欲主人以下皆受衆爵之禮而後神惠均于室中是以奠而待之也

右賓長三獻尸

席于戶內主婦洗爵酌致爵于主人主人拜受爵主婦拜送爵

席于戶內為主設席于所主之位西面也獻酒而云致爵者酒係已物不可言獻唯體神意而以爵致之也高紫超曰未獻賓而主人主婦親相致爵者蓋夫婦和而後家道成主人主婦親相致爵則皇尸其樂之矣即中庸妻子合而父母順之義然而主婦先致爵于主人者婦人以夫為天尤宜敬禮也蓋如

臣上壽于
君之意

宗婦贊豆如初主婦受設兩豆兩邊俎入設主人左執
爵祭薦宗人贊祭奠爵興取肺坐絕祭臠之興加于俎
坐挽手祭酒啐酒

郝仲興曰宗婦贊豆亦于戶外坐豆籩皆宗婦贊
主婦受以設設俎則宗人也肺離未絕祭則絕之

肝從左執爵取肝揆于鹽坐振祭臠之宗人受加于俎
燔亦如之興席未坐卒爵拜主婦答拜受爵

郝仲興曰主人主婦一爵肝燔兩從與尸
祝同者體神意重祭主也席未坐避尊也

酌酢句左執爵拜主人答拜坐祭立飲卒爵拜主人答拜主婦出反于房

酌酢者主人避尸不敢酢主婦主婦達其意因承主人爵酌以自酢也其後主人自酢敬此酢不易爵者禮婦人承男子後多不易爵也

右主婦致爵于主人自酢 胙俎臂正脊二骨

橫脊長脅二骨短脅膚一離肺一

胙俎主人承俎臂正脊二

骨者臂骨一正脊骨一也短脅不言骨一骨可知也

主人降洗酌致爵于主婦席于房中南面主婦拜受爵

主人西面答拜宗婦薦豆俎從獻皆如主人

降洗降而洗爵酌升而酌酒也席于房中獻主婦不于室也南面向堂也豆亦兩豆兩邊從獻肝燔也

主人更爵酌酢卒爵降實爵于篚入復位

男子不承婦人爵故雖自酢猶更之酌酢酌以自酢也

右主人致爵于主婦自酢主婦俎斂折其餘

如昨俎

鄭康成曰斂後足折分後右足以為佐食俎餘謂脊脅膚肺

三獻作止爵尸卒爵酢

三獻指賓而言也初賓三獻尸爵止及主人主婦致爵畢賓乃請尸飲所止之爵作起也尸卒飲遂酢賓

賓因獻祝佐食也 鄭康成曰舊

說賓入戶北面曰皇尸請舉爵

酌獻祝及佐食洗爵酌致于主人主婦燔從皆如初更

爵酢于主人卒復位

華霞峰曰此獻祝佐食及酌主人主婦者三獻之長賓也凡獻尸之後即有獻祝佐食之禮上文賓三獻因尸止爵不舉故未得即行獻禮待尸舉爵而後獻也既獻祝佐食又洗爵致主人主婦必洗爵者以異事而新之也燔從無肝也餘皆如前儀更爵不承主婦爵也酢于主人賓自酢也致爵于主人主婦乃惟酢于主人者為禮主于尊者也復位復堂下東面之位

右尸酢賓賓獻祝佐食致爵主人主婦自酢

主人降阼階西面拜賓如初

拜賓為將獻之也如初如視濯時主人再拜賓答再拜三拜眾賓眾賓答一拜也

洗賓辭洗卒洗揖讓升酌西階上獻賓賓北面拜受爵

主人在右答拜薦脯醢設折俎賓左執爵祭豆奠爵興取肺坐絕祭臠之興加于俎坐挽手祭酒卒爵拜主人答拜受爵

西階上獻賓主人就賓也主人在右北面者以東為右也折俎折牲體以實俎教君善曰自賓以下具設薦俎者皆以私人為之

酌酢奠爵拜賓答拜主人坐祭卒爵拜賓答拜

鄭康成曰主人酌自酢者實不敢敵主人而主人達其意也

揖執祭以降西面奠于其位位如初薦俎從設

位堂下之位也郝仲興曰酢畢賓揖主人自執所祭肺下堂西面奠于其位仍東面立如初其西階上所薦豆俎皆從設于位此上三節獻賓長之禮

衆賓升拜受爵坐祭立飲薦俎設于其位徧主人備答拜焉

升升西階也坐祭立飲禮殺也薦俎即堂下本位設之徧謂皆有薦俎也備答拜者衆賓拜受爵主人悉

答之也 此節
獻衆賓之禮

降實爵于篚

郝仲興曰獻畢主人下堂實爵于篚

右主人獻賓及衆賓 賓胾宗人折其餘如佐

食俎

賓之豕俎以胾左胾也宗人以折一體而分折節解者也其餘脊骨膚肺與佐食同

也 衆賓及公有司皆散烝膚一離肺一

散雜也 烝升也

豕正體不足故雜膚體以升于俎也

宗人獻與旅齒于衆賓

獻與

旅酬宗人皆在衆賓之列以齒相序

公有司門西北面東上獻次

衆賓升受降飲

公有司公家有司門西賓位也東上以右為上也其獻次于衆

賓皆賓屬也升堂

而受爵降而飲

尊兩壺于阼階東加勺南柄西方亦如之

設兩尊于阼階之東加勺尊上柄向南便執也西方西階之西也將行旅酬酬禮瘳用酒多故不敢用堂上戶東神尊而別尊于堂下也東西方皆兩壺者主黨酌其西以酬賓賓黨酌其東以酬主人便故也

主人洗觶酌于西方之尊西階前北面酬賓賓在左主人奠觶拜賓答拜主人坐祭卒觶拜賓答拜

此主人酌而自飲以導賓飲也
教君善曰此賓主之拜皆北面

主人洗觶賓辭主人對卒洗酌西面賓北面拜主人奠
觶于薦北賓坐取觶還東面拜主人答拜賓奠觶于薦
南揖復位

主人對如少牢禮主人奠爵于籩而對也主人酌西
面向賓也不授而奠酬之正禮也薦北薦左也既奠
則復位北面拜文不具耳賓西面跪取觶興還而東
面拜主人北面答拜薦南薦右也教君善曰此奠觶
于庭皆將舉者也而或在薦左或在薦右蓋各從其
便而不拘奠者于左將舉于右之義復位主人復阼
階下西面位也

右主人酬賓長

主人洗爵獻長兄弟于阼階上如賓儀

郝仲興曰長兄弟兄弟之長者酬賓而后獻兄弟獻禮成于酬成賓禮而后及其私也獻于阼階上者酌堂上之尊獻禮重于酬也如賓儀兄弟亦執祭以降奠于其位薦俎從設同也

洗獻衆兄弟如衆賓儀

郝仲興曰衆兄弟分卑如衆賓儀拜受坐祭立飲薦俎設于其位偏同也佐食在衆兄弟中薦俎亦設于此時

右主人獻長兄弟衆兄弟 佐食俎斂折脊脅

膚一離肺一

佐食于旅齒于兄弟故佐食薦俎亦與獻兄弟同時設

長

兄弟折其餘如佐食俎 衆兄弟私臣皆斂脅

膚一離肺一 私臣門東北面西上獻次兄弟

升受降飲

私臣私家用之臣門東臣位也西上以左為上也其獻次于兄弟皆主

屬也亦升堂

受爵而降飲

洗獻內兄弟于房中如獻眾兄弟之儀主人西面答拜

內兄弟女賓及宗婦也獻于房中亦如眾兄弟拜受坐祭立飲設薦俎于其位而徧也少牢禮賓主受送之拜皆南面統于堂也 高紫超曰皇尸之意欲其內外之間惠無不徧故內兄弟皆獻之

更爵酢卒爵降實爵于篚入復位

爵徧主人乃更爵自酢蓋內兄弟多主人惟為酢一爵也

右主人獻內兄弟自酢 尊兩壺于房中西墉

下南上

此為主婦與內賓宗婦族而設也南上統于堂也

內賓立于其

北東面南上宗婦北堂東面北上

內賓女賓姑姊妹之屬宗

婦族人之婦北堂房之北也房無北壁故其後半亦得稱北堂宗婦宜統于主婦主婦南面故

宗婦以北為上 內賓宗婦皆般胥膚一離肺一

長兄弟洗觚為加爵如初儀不及供食洗致如初無從

洗觚更器也加爵加尸爵也大夫士三獻而禮成多則為加也如初儀如正獻時尸拜受主賓拜送與自酢同也不及佐食及祝而止也佐食本兄弟輩尚未獻尸故爵不及洗致洗爵致于主人主婦也亦如賓

初致爵之儀但無肝燔從異也。高紫起曰主人及賓雖已獻尸而長兄弟及眾賓未嘗致爵以是為恕故復為加爵以厭飲之然必長兄弟先為加爵而後及眾賓者猶主人為初獻而賓為三獻之意蓋子弟欲養其尸急于他姓故也。

右長兄弟為加爵

眾賓長為加爵如初爵止

眾賓之中長者一人舉爵于尸如賓三獻之儀爵止者尸受眾賓長所獻之爵奠之而不舉蓋三獻外又受加爵必賓及兄弟行旅酬之禮而後神惠均于在庭故奠而待之也。

右眾賓長為加爵

嗣舉奠句盥入北面再拜稽首

嗣主人之嫡長子將為父後者也奠即祝酌奠于銅南之觶自尸入祭啐祭奠而未舉至是令嗣子舉而飲之重嫡嗣故特為此禮若無嫡嗣則已盥入盥手于洗乃入室也郝仲興曰嗣子舉奠先自飲酌尸尸啐而奠之蓋酬尸也故其後即繼以旅酬

尸執奠句進受句復位祭酒啐酒

尸執奠者執奠觶以授嗣子也進受者嗣子進于尸前而受觶也復位復其北面之位

尸舉肝句舉奠左執觶句再拜稽首進受肝復位坐食

肝卒觶拜尸備答拜焉

肝即向之加于菹豆者尸舉之以授嗣子也舉奠指嗣子而言高紫超謂名嗣為舉奠猶名賓為三獻是也備答拜者每拜答之重繼體也高紫超曰嗣有傳重之責宗祧之任係焉尸執奠以飲之舉肝以食之愛其子孫之無已也

舉奠洗酌入尸拜受舉奠答拜尸祭酒啐酒奠之舉奠出復位

郝仲興曰嗣子卒飲洗解更酌酒入室尸拜受嗣子拜送尸祭啐之奠之嗣子出復位與子姓共立于堂下東主人之後也高紫超曰嗣孫敬愛其祖故亦洗酌獻之而尸拜受者以其為世嫡家子故敬之而特為之啐酒以享其意也

右嗣舉奠 嗣舉奠佐食設豆鹽

鄭康成曰
肝宜鹽也

兄弟弟子洗酌于東方之尊阼階前北面舉觶于長兄

弟如主人酬賓儀

如主人酬賓儀謂洗酌拜坐祭卒觶更洗酌奠觶長
兄弟取觶奠于薦右同也 此兄弟之弟子各舉觶
于其父兄也高紫超曰兄弟弟子各舉觶于其長則
一家敦睦肅敬之心可想而宜為皇尸之所樂矣

宗人告祭脊乃羞

所告者衆賓衆兄弟內兄弟也肉在俎曰胾獻時設
薦俎各于其位而末及祭至是宗人告使皆祭也乃
羞進庶羞也禮庶羞不踰牲則此羞當即
以豕肉為之自尸以下至內賓皆有羞也

賓坐取觶阼階前北面酬長兄弟長兄弟在右賓奠觶
拜長兄弟答拜賓立卒觶酌于其尊東面立長兄弟拜
受觶賓北面答拜揖復位

郝仲興曰賓坐取觶即前受主人酬觶奠于薦南者
至是舉以酬長兄弟賓酬兄弟就東階下北面兄弟
在右以兄弟亦有主人之誼賓常居西也酌于其尊
于東尊也堂下東尊本為兄弟設賓東面向長兄弟
也復位賓酬畢復西階下東
向之位 此賓酬長兄弟也

長兄弟西階前北面衆賓長自左受旅如初長兄弟卒
觶酌于其尊西面立受旅者拜受長兄弟北面答拜揖

復位

長兄弟復就西階前酬衆賓之長其儀如賓酬長兄弟謂奠饌拜受旅者答拜也酌于其尊于西尊也堂下西尊本為賓設西面立向賓也復位長兄弟酬畢復阼階下西向之位此長兄弟酬衆賓也

衆賓及衆兄弟交錯以徧皆如初儀

衆賓又酬衆兄弟衆兄弟又酬衆賓衆賓與衆兄弟其數既多又皆交錯相酬以遍則同異姓之間歡情浹洽而無間矣此衆賓與衆兄弟互相酬以徧也高紫超曰長賓長兄弟衆賓衆兄弟交錯徧酬雍睦而有禮皆皇尸之所樂也故于祭畢而備行之至此則神之惠無不徧而主人之情亦無不洽矣

為加爵者作止爵如長兄弟之儀

為加爵者眾賓長也眾賓長為加爵時尸以未行旅酬奠而未飲今既旅及眾賓與兄弟尸可飲矣故為加爵者作起其初止之爵請尸飲如長兄弟加爵之儀尸卒爵拜答拜自酢復位同也此尸飲眾賓長之加爵也

長兄弟酬賓如賓酬兄弟之儀以徧卒受者實解于篚

如賓酬兄弟之儀謂奠解受解拜答拜復位等儀同也徧謂賓亦東階前酬眾兄弟復位眾兄弟及眾賓亦交錯以徧也此長兄弟酬賓實酬眾兄弟眾兄弟與眾賓互相酬以徧也

右兄弟弟子舉觶于其長乃旅酬 佐食于旅

齒于兄弟

佐食以兄弟輩為之故旅酬則與兄弟相齒

主婦及內

賓宗婦亦旅西面

鄭康成曰西面者異于獻也男子獻于堂上旅于堂下婦

人獻于南面旅于西面內賓象衆賓宗婦象兄弟其節與其儀依男子也

賓弟子及兄弟弟子洗各酌于其尊句中庭北面西上

舉觶于其長奠觶拜長皆答拜舉觶者祭卒觶拜長皆

答拜

賓弟子與兄弟弟子洗爵酬其長此無算爵之始也各酌于其尊賓弟子酌西尊兄弟弟子酌東尊也中庭北面者其長各在東西階前其弟子各向之也皆西上上賓也鄭康成曰弟子舉觶于其長所以序長幼教孝弟拜亦皆北面

舉禪者洗各酌于其尊復初位長皆拜舉禪者皆奠禪
于薦右長皆執以興舉禪者皆復位答拜長皆奠禪于
其所皆揖其弟子弟子皆復其位

教君善曰薦右賓之薦南兄弟之薦北也奠于此者
因其所改奠之處也緣長者意不欲勞其復遷之也
執以興亦象受之其所薦
右也揖揖之使復其位

爵皆無算

賓取解酬兄弟之黨長兄弟取解酬賓之黨唯其所
賜交錯以徧無復多寡限量之數也教君善曰其
儀之與旅酬異
者惟不拜耳

右賓弟子兄弟弟子各舉觶于其長遂無算爵

利洗散獻于尸酢

利即佐食也更名利者利之言養也佐食左右尸飲食能養尸者也禮將終告利成故利終獻以成禮也獻用散更器也酢利自酢也郝仲興曰佐食為役室中有事不得與衆同加爵事畢乃獻尸亦加爵也正獻三主人主婦賓也加獻三長兄弟衆賓長佐食也獻為正加為從嗣子舉奠為酬不在從獻之數

及祝如初儀降實散于篚

及祝者惟獻祝不致爵主人主婦也如初儀如長兄弟衆賓長加爵之儀其拜受拜送自酢同也華霞峰曰凡獻尸之後必獻祝

右佐食獻尸及祝

主人出立于戶外西面祝東面告利成

郝仲興曰西面坊本作西南誤

告利成告孝子養禮終也

尸諛祝前主人降

祝入而尸起也詳見士虞禮降降堂下也高紫起曰尸諛而主人不拜送者主人固不忍于尸去也但尸自儻然而興耳如楚詞所謂飈遠舉兮雲中者也

祝反及主人入復位命佐食徹尸俎俎出于廟門徹庶羞設于西序下

祝反送尸反也。徹尸俎出廟門以歸尸也。徹庶羞設于西序下。鄭康成云庶羞主為尸。非神饌為將餽故去之也。徹之于西序下者亦將以燕飲也。自尸祝至于兄弟之庶羞宗子以與庶人燕飲于堂內。賓宗婦之庶羞主婦以燕飲于房中。庸所謂燕毛詩楚茨所謂燕私也。賈汾州曰楚茨鼓鍾送尸下云備言燕私。鄭注祭祀畢歸賓客之俎同姓則留與之燕。所以尊賓客親骨肉也。

右尸出 賓從尸 句俎出廟門乃反位

鄭康成曰賓從

尸送尸也。助祭者終其事也。俎尸俎也。復入反位者宜與主人為禮乃去之也。

尸卒

食而祭饌饗饗饗

鄭仲興曰尸卒食則饗事畢執饗者祭饗以報也。饌饗以

炊黍稷饗饗以烹牲魚腊。鄭康成曰舊說宗婦祭饌饗烹者祭饗饗用黍肉而已無籩豆俎。

筵對席佐食分簋鉶

筵對席布對餽之席也。簋卽敦也。分簋中黍稷與鉶中和羹為二餽分之也。故君善曰筵對席設對席于饌東也。此于神席亦為少。北其名義與昏禮之對席同。

宗人遣舉奠及長兄弟盥立于西階下東面北上祝命嘗食餽者舉奠許諾升入東面長兄弟對之皆坐佐食授舉各一膚

北上嗣子位在長兄弟之上尊繼體也。命嘗食猶言命餽者嘗食也。升入升堂入室也。嗣子東面升尸席也。長兄弟對之升對席也以膚為舉亦欲其每食則啗之也。餽鄭本作饗而注云古文饗皆作餽今從

古文

主人西面再拜祝曰餽有以也兩餽奠舉于俎許諾皆
答拜若是者三皆取舉句祭食句祭舉句乃食句祭鉶

句
食舉

郝仲興曰餽有以先澤享此教嗣子兄弟思先也
饌者置所舉膚于俎應且拜許諾應聲主人三祝二
餽三諾三答拜乃舉以祭祭食祭飯也次祭舉祭肉
也乃食食飯也後祭鉶羹乃食舉祭皆畢而後食肉
也高紫超曰餽有以也先祖有德而享此祭故
子孫得蒙其福而餽之是當念其祖德而不忘也

卒食主人降洗爵宰贊一爵主人升酌醕上餽上餽拜

受爵主人答拜醕下餽亦如之

邾仲與曰主人降洗爵宰以一爵助醕二餽用二爵也上餽即嗣子下餽即長兄弟

主人拜祝曰醕有與也如初儀兩餽執爵拜祭酒卒爵拜主人答拜兩餽皆降實爵于篚

邾仲與曰醕有與與兄弟共飲親親之意也如初亦三祝也高紫超曰與謂有所施及于人言當相教相與以尊先祖之德也

工餽洗爵升酌酢主人主人拜受爵上餽即位坐答拜主人坐祭卒爵拜上餽答拜受爵降實于篚主人出立

于戶外西面

上餽升酢主人重嗣子也此祭禮之末一爵主人拜而受之善終者如始之義也嗣子既授爵于主人復戶內北面之位跪而答拜受主人虛爵實于篚主人出餽禮畢也

右餽

祝命徹胙俎豆籩設于東序下

祝命命佐食也胙俎主人之俎設于東序下亦將燕也

祝執其俎以出東面于戶西

其俎祝俎也祝自執以出室不敢煩他人也立戶外之西俟告利成乃執俎以出廟門也

宗婦徹祝豆籩入于房徹主婦薦俎

教君善曰此所徹者皆置于房故宗婦為之

佐食徹尸薦俎敦設于西北隅几在南扉用筵納一尊

佐食盥牖戶降

佐食徹尸薦俎及敦改設于西北隅筵亦席也納于室中北牖下以其為酌神之酒故亦改設而未即徹也不納玄酒之尊者以其初不用于神也教君善曰凡祭奠之禮其徹尊者之盛饌必改設之乃去之此既餞矣復改設而未徹去者重其為神之餘食也

右徹俎改設

祝告利成降出

郝仲興曰時主人立室戶外西面祝立戶外東面祝向主人告利成遂降出

主人降即位宗人告事畢

即位即堂下東方之位

賓出主人送于門外再拜


拜送于廟門外少牢禮送賓出婦人乃徹室中之饌

佐食徹胙俎堂下俎畢出

胙俎在室東序既改設乃徹之堂下俎賓及兄弟以下之俎畢出各以歸也鄭康成曰兄弟及衆賓自徹

而出唯賓組有司
徹歸之尊實也

右禮畢



禮經本義卷十五